



GRONDWET

VAN DIE

**SA HACKNEYPERDETELERS-
GENOOTSKAP**

INHOUDSOPGAWE

		BLADSY
WOORDOMSKRYWING		
KLOUSULES		
1.	NAAM VAN GENOOTSKAP	
2.	DOELSTELLINGS	
3.	MAGTE VAN DIE GENOOTSKAP	
4.	LIDMAATSKAP	
5.	REGISTER VAN LEDE	
6.	REGTE EN VOORREGTE VAN LEDE	
7.	LEDEGELD EN GELDE	
8.	BEDANKINGS, SKORSING EN OPHEFFING VAN STEMREG VAN LEDE	
9.	HERAANSLUITINGE VAN LEDE	
10.	VERKIESING VAN RAAD EN UITVOERENDE KOMITEE	
11.	MAGTE EN PLIGTE VAN DIE RAAD	
12.	VERGADERINGS	
13.	NOTULES VAN VERGADERINGS	
14.	FINANSIËLE BEPALINGS	
15.	LIDMAATSKAP VAN DIE VERENIGING EN AFFILIASIE	
16.	VERKIESING VAN VERTEENWOORDIGERS TOT DIE ALGEMENE JAARVERGADERING VAN DIE VERENIGING	
17.	GRONDWETLIKE WYSIGINGS	
18.	KANTOOR VAN DIE GENOOTSKAP	
19.	OUTENTIEKE LESING VAN HIERDIE GRONDWET	

ALGEMENE VERORDENINGE		
1.	KUDDEBOEK	
	VOORVOEGSEL EN IDENTIFIKASIE	
	IDENTIFIKASIE	
	NAME	
	KENNISGEWING VAN GEBOORTES	
	DEKKING-EN INSEMINERINGSERTIFIKATE EN DIE GESAMENTLIKE BESIT VAN HINGSTE	
	DRAGTIGHEIDS- EN INTERVULPERIODE	
	VEREISTES VIR AANTETENING EN REGISTRASIE	
	INSPEKSIE EN PLIGTE VAN DIE INSPEKTEUR/KEURDER	
	REKORDS VAN DIERE	
	REÛLS MET BETREKKING TOT KUNSMATIGE INSEMINERING (K.I.)	
	REÛLS MET BETREKKING TOT DIE OPVANG VAN EISELLE EN EMBRIO-OORPLASINGS (E.O.)	
	INGEVOERDE EISELLE	
	AANTEKENING-EN REGISTRASIESERTIFIKATE	
	DNS-TIPERING	
	OORDRAGTE	
	HERSTEL VAN DIERE IN DIE KUDDEBOEK	
	KANSELLERING VAN REGISTRASIE	
	VERANDERING OF BYVOEGINGS OP REGISTRASIESERTIFIKATE	
	DUPLIKAAT REGISTRASIESERTIFIKATE	
	SERTIFIKAAT VAN UITGEBREIDE STAMBOOM	
	INVOER EN UITVOER VAN PERDE, SEMEN EN EISELLE	
	UITVOERSERTIFIKATE	
	OORDRAG VAN BEVOEGDHEDE	
	NIE-LEDE	

		BLADSY
BYLAE		
A	GELDE VAN DIE GENOOTSKAP	
B	AANSOEK OM LIDMAATSKAP	
C	DEKKINGSERTIFIKAAT	
D	GEBORTEKENNISGEWINGVORM	
SKEDULE		
K	INSEMINERINGSERTIFIKAAT	
O	INOVULERINGSERTIFIKAAT	

GRONDWET VAN DIE SUID-AFRIKAANSE HACKNEYPERDETELEERSGENOOTSKAP

1. WOORDOMSKRYWING

Wanneer dit in hierdie Grondwet gebruik word en 'n strydige mening nie duidelik uit die verband blyk nie, beteken –

- (a) "Departement," die Departement van Landbou in die Nasionale regering;
- (c) "dier", 'n Suid-Afrikaanse Hackneyperd wat in die Kuddeboek geregistreer is of daarvoor geskik is, en die woord "hings/te", "merrie/s", "perd/e" en "vul/lens" sal dieselfde betekenis hê;
- (d) "eienaar" die persoon wie —
 - (i) volgens die rekords van die Vereniging, sodanige dier besit; of
 - (ii) tot bevrediging van die Raad bewys lewer dat sodanige dier geskik is om in sy naam geregistreer te word; of
 - (iii) in die geval van 'n ingevoerde dier geregtig is om die dier in sy naam in die erkende kuddeboek van die land van herkoms te registreer;
- (e) "eisel", 'n eisel van 'n dier en sluit ook 'n embrio in;
- (f) "embrio", 'n bevrugte eisel van 'n dier;
- (g) "Gebied", Suid-Afrika en sodanige ander lande soos van tyd tot tyd deur die Genootskap met die goedkeuring van die Vereniging bepaal;
- (h) "geboorte", die geboorte van 'n dier;
- (i) "Genootskap", Suid-Afrikaanse Hackneyperdetelersgenootskap;
- (j) "Grondwet", die Grondwet (met inbegrip van die Verordeninge en Skedules) van die Genootskap;
- (k) "Inspekteur/Keurder", 'n persoon in die hoedanigheid as Inspekteur/Keurder deur die Raad aangestel;
- (l) "koper", die persoon of persone aan wie eienaarskap of gesamentlike eienaarskap van 'n dier oorgedra word deur die verkoper van sodanige dier;
- (m) "Kuddeboek", die Suid-Afrikaanse Hackneyperd Kuddeboek waarin die besonderhede van alle diere, deur die Genootskap ingeskryf word;
- (n) "Minister", die Minister verantwoordelik vir landbou;
- (o) "Raad", die Raad van die Genootskap amptelik verkies ingevolge die bepalings van die Grondwet;
- (p) "ras", die Suid-Afrikaanse Hackneyperdras;
- (q) "Registrateur" die beampte ingevolge die Wet aangewys as Registrateur van Diereverbetering;

- (r) "registreer", die prosedure van registrasie van diere deur die Vereniging in die Volgeregistreerde en Hulpstamboekafdelings van die Kuddeboek, of waardeur 'n voorvoegsel deur die Vereniging op rekord geplaas word;
 - (s) "Sekretaris", die Sekretaris van die Genootskap;
 - (t) "semen", die semen van 'n dier;
 - (u) "'n Suid-Afrikaanse dier" (vir doeleindes van registrasie), 'n dier wat in of onderweg na Suid-Afrika gebore is: Met dien verstande dat 'n dier wat gebore word as gevolg van 'n ingevoerde eisel, as 'n ingevoerde dier beskou word;
 - (v) "teler", 'n lid van die Genootskap wie die eienaar is van —
 - (i) die moeder ten tyde van die geboorte van 'n dier;
 - (ii) sodanige dier tydens eerste aanneme vir registrasie in die eerste afdeling van die Kuddeboek; of
 - (iv) die draermerrie van sodanige embrio ten tyde van die geboorte van 'n vul as gevolg van 'n embrio-oorplasing;
 - (w) "Vereniging", die Suid-Afrikaanse Stamboek- en Diereverbeteringsvereniging;
 - (x) "verkoper", die persoon of persone wie, volgens die rekords van die Vereniging, die eienaar/gesamentlike eienaar/s van 'n dier is, of in die geval van 'n ingevoerde dier, die eienaar in die land van herkoms, wie sodanige dier verkoop het;
 - (y) "Vulboek", die Vulboek van die Genootskap waarin die besonderhede van alle Suid-Afrikaanse Hackneyperdvullens aangeteken word ten opsigte waarvan geboortekennisgewings ingedien was;
 - (z) "Wet", die Wet op Diereverbetering, 1998 (Wet No. 62 van 1998), insluitende die regulasies uitgevaardig ingevolge daarvan.
2. Ander woorde, afkortings en terme gebruik in die Grondwet, wat nie hierbo omskryf is nie, en waaraan 'n bepaalde betekenis geheg word in die Wet, sal dieselfde beteken as in die Wet.
 3. Tensy 'n teenstrydige bedoeling duidelik uit die verband blyk, sal alle woorde wat in die Grondwet na persone in die manlike geslag verwys, die vroulike geslag insluit en woorde in die enkelvoud, sal die meervoud insluit en woorde in die meervoud, sal die enkelvoud insluit.

GRONDWET VAN DIE SUID-AFRIKAANSE HACKNEYPERDETELEERSGENOOTSKAP

1. NAAM VAN DIE GENOOTSKAP

Die naam van die Genootskap is die SA Hackneyperdetelersgenootskap.

2. DOELSTELLINGS

2.1 Onderhewig aan die bepalings van die Wet en hierdie Grondwet is die doelstellings en magte van die Genootskap om-

- (a) die teelt en genetiese verbetering van SA Hackneyperde aan te moedig in die Gebied deur uitvoering te gee aan die magte en pligte verleen aan die Genootskap ingevolge die Wet ten opsigte van registrasie van stambome by die Vereniging, invoer en uitvoer van SA Hackneyperde, semen en eiselle, tegniese-, adviserende- en inspeksiedienste of op enige ander wyse;
- (b) om die rasegtheid van SA Hackneyperde in die Gebied te bewaar en om deur alle moontlike en beskikbare middele belangstelling in die ras te bevorder;
- (c) om noukeurige verslae van die stambome en besonderhede van die SA Hackneyperde saam te stel, te bewaar en in stand te hou of te laat saamstel bewaar en instandhou, met die doel vir registrasie deur die Vereniging;
- (d) om 'n "Standaard van Voortreflikheid" vir die ras op te stel;
- (e) om vir tentoonstelling doeleindes verskillende klasse vir SA Hackneyperde te verkry en beoordelaars te benoem wat bevoeg geag word om die ras te beoordeel, en om landbougenootskappe en andere te oortuig van die wenslikheid en noodsaaklikheid daarvan om slegs beoordelaars aan te stel wat deur die Genootskap aanbeveel word;
- (f) om die verkoop van SA Hackneyperde te bevorder;
- (g) om deur samewerking met die Vereniging en die Departement, voorligting te gee om SA Hackneyperde te verbeter;
- (h) om in die algemeen alles in sy vermoë te doen ter bevordering van sy lede se belange met betrekking tot hul bedrywighede in verband met SA Hackneyperde en;
- (i) om inligting in te win en te versprei aangaande die beste wyse waarop die teling van SA Hackneyperde die beste uitgevoer en op die voordeligste manier uitgebou en voortgesit kan word en lede op hoogte te hou met wetenskaplike en ander ontwikkelinge; en
- (j) om sodanige funksies te vervul en pligte uit te voer soos aan die Genootskap opgelê is deur die Wet as gevolg van sy lidmaatskap van die Vereniging.

2.2 Die Genootskap -

- (a) mag nie gemoeid wees met enige winsgewende bedrywighede; of deel hê in enige besigheids-, professionele- of beroepsbedrywighede van enige van sy lede, of die voorsiening aan enige van sy lede van geldelike hulp van enige perseel of aanhoudende dienste of fasiliteite wat deur sy lede benodig word vir die beoefening van 'n besigheid, profesie of beroep nie; en
- (b) het nie die mag om besigheid te bedryf nie, insluitend gewone handels-transaksies in die loop van besigheid, spekulatiewe transaksies dividende verminderingsaksies, sowel as die aankoop van eiendom vir die verhuring daarvan op 'n stelselmatige of gereelde basis.

3. MAGTE VAN DIE GENOOTSKAP

Onderhewig aan die bepalings van die Grondwet sal die Genootskap die mag hê —

- (a) om kragtens sy lidmaatskap van die Vereniging en die verlening van regs persoonlikheid aan die Genootskap in terme van die Wet, sodanige funksies te vervul en pligte uit te voer soos deur die Wet neergelê; en
- (b) om oor die algemeen stappe te neem soortgelyk aan dié wat 'n regs persoon by wetgewing kan verrig ten einde sy doelstellings te bereik.

4. LIDMAATSKAP

4.1 Verkiesbaarheid

Lidmaatskap van die Genootskap sal beperk word tot persone bo die ouderdom van 18 jaar, behoudens die bepalings van Subklousule 4.2.4.

4.2 Indeling van Lidmaatskap

Lidmaatskap sal uit die volgende lede bestaan —

4.2.1 Gewone lede

Alle persone wat in die Gebied woon en direk of indirek gemoeid is met die teelt van SA Hackneyperde betrokke is, insluitend in die B.L.S. lande woonagtig is, kan in aanmerking kom vir lidmaatskap van die Genootskap as Gewone Lede. Vir die doeleindes van hierdie subklousule word 'n maatskappy, private maatskappy, beslote korporasie, vennootskap, regs persoon of trust beskou as 'n persoon en kan in aanmerking kom vir Gewone Lidmaatskap van die Genootskap.

4.2.2 Lewenslange-Erelede

Vir spesiale dienste gelewer in belang van die ras mag die Algemene Jaarvergadering 'n persoon tot Lewenslange-Ereleid verkies, op voorwaarde dat dit op aanbeveling van die Raad geskied. Sodanige Lewenslange-Ereleid sal al die regte en voorregte van lidmaatskap geniet, insluitende stemreg by enige vergadering van die Genootskap en ook tot die Raad verkiesbaar wees.

4.2.3 Spesiale Erelede

Persone wie nie noodwendig aktief gemoeid is met die teelt van SA Hackneyperde nie, mag deur die Raad verkies word tot Spesiale Ereleid, op sodanige voorwaardes soos deur die Raad bepaal mag word. 'n Spesiale Ereleid sal geen stemreg by vergaderings van die Genootskap hê nie, en sal ook nie tot die Raad verkiesbaar wees nie.

4.2.4 Junior Lede

Persone onder die ouderdom van 18 jaar mag, mits die Raad dit goedkeur, Junior Lede word. Sodanige Junior Lede sal geen stemreg by vergaderings hê nie en nie tot die Raad verkiesbaar wees nie. Na die betaling van die vasgestelde gelde mag hulle aan die ander aktiwiteite van die Genootskap deelneem.

4.2.5 Skou-lede

Alle persone wat direk of indirek gemoeid is met die vertoon van SA Hackneyperde kan in aanmerking kom vir lidmaatskap van die Genootskap as Skou-lede. Skou-lede sal nie die regte en voorregte ontvang soos van toepassing op gewone lede nie. Skou-lede mag nie tot lid van die Raad verkies word nie en sal geen stemreg by die vergaderings van die Genootskap hê nie.

4.3 Maatskappy, Private Maatskappy, Beslote Korporasie, Vennootskap, Regspersoon of Trust

4.3.1 'n Maatskappy, private maatskappy, beslote korporasie, vennootskap, regs persoon of trust wat om Gewone Lidmaatskap aansoek doen, moet aan die Genootskap sodanige feite en gegewens voorlê as wat nodig mag wees om die aard van die beherende aandeel daarin te bepaal en moet dan; of te eniger tyd daarna, benewens die vereiste gegewens wat van alle aansoekers verlang word, die Genootskap verder in kennis stel van die naam en adres van die natuurlike persoon wat aangestel is om as sy verteenwoordiger by die vergaderings van die Genootskap op te tree:

Op die verdere voorwaarde dat sodanige natuurlike persoon die reg sal hê om skriftelik 'n plaasvervanger te benoem. Sodanige skriftelike benoeming moet die Genootskap nie later nie as voor die aanvang van die vergadering waarop sodanige plaasvervanger moet stem, bereik.

Ten opsigte van 'n vennootskap of trust moet die volle name en adresse van alle vennote of trustees by tye van aansoek om lidmaatskap aan die Genootskap verstrekkend word en sulke vennote of trustees sal gesamentlik en afsonderlik vir alle verpligtinge teenoor die genootskap verantwoordelik wees.

4.3.2 Alle stukke wat aan sodanige gevolmagtigde verteenwoordiger, soos in Subklousule 4.2.1 uiteengesit, gerig is, word beskou as behoorlik op die maatskappy, private maatskappy, beslote korporasie, vennootskap, regs persoon of trust bestel te wees en by alle vergaderings wat deur sodanige gevolmagtigde verteenwoordiger namens die maatskappy, private maatskappy, beslote korporasie, vennootskap, regs persoon of trust bygewoon word, word die maatskappy, private maatskappy, beslote korporasie, vennootskap, regs persoon of trust beskou as behoorlik verteenwoordig te wees.

4.3.3 Die natuurlike persoon wat soos in Subklousule 4.3.1 uiteengesit, aangewys is om sodanige maatskappy, private maatskappy, beslote korporasie, vennootskap, regs persoon of trust te verteenwoordig, mag tot die Raad verkies word.

4.3.4 Indien so 'n maatskappy, private maatskappy, beslote korporasie, vennootskap, regs persoon of trust in gebreke bly om aan die vereistes van Gewone Lidmaatskap te voldoen, soos in Subklousule 4.2 uiteengesit, sal sy lidmaatskap van die Genootskap beëindig word en die bepalinge van die volgende Subklousule (4.3.5) sal *mutatis mutandis* op so 'n maatskappy, private maatskappy, beslote korporasie, vennootskap, regs persoon of trust van toepassing wees.

4.3.5 In die geval van die likwidasie van 'n maatskappy, private maatskappy of beslote korporasie of die ontbinding van 'n vennootskap of trust, sal lidmaatskap van die Genootskap outomaties beëindig word: Met dien verstande dat —

(a) alle gelde of bedrae aan die Genootskap verskuldig op die datum van likwidasie of ontbinding deur die Genootskap gevorder sal word van die likwidateur van sodanige maatskappy, private maatskappy of beslote korporasie of van die lede (hetsy gesamentlik of afsonderlik) van sodanige vennootskap, regs persoon of trust gevorder sal word.

(b) die likwidateur van sodanige maatskappy, private maatskappy of beslote korporasie en die lede van sodanige vennootskap, regs persoon of trust verplig sal wees om al die verpligtinge van so 'n maatskappy, private maatskappy, beslote korporasie, vennootskap, regs persoon of trust na te kom ten opsigte van registrasies, oordragte, of enige verpligtinge wat die maatskappy, private maatskappy, beslote

korporasie, vennootskap, regspersoon of trust as lid van die Genootskap moes nakom; en.

- (c) enige gelde wat betaalbaar mag wees, soos kuddegelde, registrasies, oordragte of ander verpligtinge wat na so 'n outomatiese beëindiging van lidmaatskap nagekom moet word, ooreenkomstig die skaal vir Gewone Lede of Lewenslange Lede opgelê sal word.

4.4 Geregistreerde Telers

4.4.1 Enige persoon met inbegrip van 'n maatskappy, private maatskappy, beslote korporasie, vennootskap, regspersoon of trust woonagtig in die Gebied buite Suid-Afrika wat belangstelling toon in die teel van diere en wie direk en indirek gemoeid is met die teel van diere, sal in aanmerking kom vir aanvaarding as 'n Geregistreerde Teler.

4.4.2 Uitgesonderd die reg om -

- (a) op 'n algemene vergadering te stem, en
- (b) om tot die Raad verkies te word,

sal al die regte, voorregte en verpligtinge wat lede *mutatis mutandis* van toepassing wees om alle lede wie aansoek doen om by die Genootskap geregistreer te word of wie reeds by die Genootskap as Geregistreerde Teler geregistreer is. Geregistreerde Telers is *ipso facto* aanspreeklik vir kostes aan die Vereniging.

4.5 Aansoek om Lidmaatskap

4.5.1 Aansoek om lidmaatskap van die Genootskap moet op die voorgeskrewe vorm (Bylae B) aan die Genootskap gerig word. Die aansoek moet ook vergesel gaan van die betrokke subskripsie en/of intreegeld soos uiteengesit in die Bylae van Gelde van die Genootskap (Bylae A). (Hierdie gelde kan aangepas word soos van tyd tot tyd deur die Raad bepaal.)

4.5.2 'n Aansoek om lidmaatskap moet vergesel gaan van die nodige bewys dat aan die bepaalde vereistes beantwoord word, en identiteitsnommers moet verstrek word.

4.5.3 Die Raad mag die aansoek om lidmaatskap van enige persoon aanvaar, hetsy onvoorwaardelik of op sodanige voorwaardes as wat die Raad mag bepaal, of enige aansoek weier.

4.5.4 Indien 'n aansoek om lidmaatskap geweier is, sal die aansoeker geregtig wees op die terugbetaling van enige gelde wat sy aansoek vergesel het.

5. REGISTER VAN LEDE

5.1 Die Genootskap sal 'n register van alle lede hou waarin die datum van toelating tot lidmaatskap, hul posadres, bedrae van hul ontvang en die datum van betaling, agterstallige gelde, indien enige, wat verskuldig mag wees, aangeteken moet word.

5.2 Elke lid moet die Genootskap skriftelik binne een maand van 'n verandering van sy posadres in kennis stel en alle kennisgewings op publikasies wat aan 'n lid se aangetekende adres gestuur is, sal beskou word as behoorlik op sodanige lid bestel te wees.

5.3 Alle stukke wat per aangetekende pos deur die Genootskap aan lede versend is, sal as bindend beskou word.

6. REGTE EN VOORREGTE VAN LEDE

Uitgesluit eksekuteurs van afgestorwe boedels, kurators van insolvente boedels en likwidateurs van maatskappye of private maatskappye sal die regte en voorregte van elke lid van die Genootskap persoonlik op homself van toepassing wees en dit is nie oordraagbaar nie, hetsy deur sy eie handeling of deur enige wetsbepaling.

Regte van lede sal, onderworpe aan die bepalings van Klousule 4, die volgende insluit —

- (a) om alle verslae en ander publikasies te ontvang wat deur die Genootskap vir verspreiding onder lede uitgegee word;
- (b) om alle algemene vergaderings van die Genootskap by te woon en om op sodanige vergaderings te stem;
- (c) om aansoek te doen om die registrasie van SA Hackneyperde in ooreenstemming met die bepalings van die Grondwet;
- (d) om, indien beskikbaar, alle deskundige tegniese advies met betrekking tot aangeleenthede rakende SA Hackneyperde van die Genootskap se Inspekteurs/Keurders en amptenare te ontvang. Alle kostes wat hieraan verbonde mag wees, moet deur die aansoeker betaal word;
- (e) om die Genootskap se amptelike verslae te raadpleeg en te gebruik; en
- (f) om oor al die regte en voorregte en verpligtinge soos in die Grondwet uiteengesit, te beskik.

7. LEDEGELD EN GELDE

- 7.1 Alle ledegelde of enige ander gelde en kommissie aan die Genootskap betaalbaar, word van tyd tot tyd deur die Raad bepaal en word vir kennisname op die eerste daaropvolgende algemene vergadering van die Genootskap voorgelê.
- 7.2 Die jaarlikse ledegelde is vooruitbetaalbaar op 1 Januarie van elke jaar en sal as agterstallig beskou word as dit nog nie op 28 Februarie van dieselfde jaar betaal is nie.
- 7.3 Enige lid wie —
 - (a) se ledegelde agterstallig is;
 - (b) of wat gelde en kommissie aan die Genootskap skuld ten opsigte van enige gelde of verpligtinge vir meer as 30 (dertig) dae nadat 'n eis om betaling daarvan deur die Sekretaris aan hom gerig is, sal daarna geen regte of voorregte van lidmaatskap geniet voordat sodanige skulde aangesuiwer is nie.
- 7.4 Die Raad mag opdrag gee dat rente en/of boetes gehef word op alle agterstallige rekeninge teen 'n koers soos van tyd tot tyd deur die Raad bepaal mag word.
- 7.5 Enige lid wie om watter rede ook al, ophou om lid van die Genootskap te wees, sal aanspreeklik bly vir alle bedrae wat ten tyde van die beëindiging van sy lidmaatskap deur hom aan die Genootskap verskuldig was.
- 7.6 Indien die Raad sou beslis dat die rekening van 'n lid agterstallig is of ten tyde van die beëindiging van sy lidmaatskap uitstaande is, sal so 'n lid, indien sy rekening vir invordering aan 'n firma van prokureurs oorhandig word, verantwoordelik gehou word vir die betaling van alle regs-kostes, invorderingsgelde, prokureursgelde en kliëntkoste wat dit mag meebring, tesame met die oorspronklike bedrag, boetes en eise wat deur hom aan die Genootskap verskuldig is.

8. BEDANKINGS, SKORSING EN OPHEFFING VAN STEMREG VAN LEDE

8.1 Bedanking van Lede

Enige lid mag bedank as lid van die Genootskap deur nie minder nie as een maand voor die finansiële jaareinde skriftelik en per aangetekende pos kennis daarvan aan die Genootskap te gee: Met dien verstande dat —

- (a) sodanige bedanking minstens voor 31 Desember ingedien moet word;
- (b) geen ledegelde of gedeelte daarvan terugbetaalbaar sal wees nie; en
- (c) alle gelde aan die Genootskap verskuldig ten volle betaal is en die lid sy verpligtinge nagekom het ten opsigte van dokumente, rekords, registrasies en oordragte of enige ander verpligting met betrekking tot sy lidmaatskap deur die Genootskap vereis.

8.2 Skorsing van Lede

8.2.1 Die Raad mag 'n lid skors wat —

- (a) in gebreke gebly het om enige bedrag wat deur hom aan die Genootskap verskuldig is binne 60 (sestig) dae te betaal nadat 'n skriftelike eis vir sodanige vereffening deur die Sekretaris onderteken, aan hom gepos is;
- (b) die Grondwet of enige reël van die Genootskap oortree het of wat na oordeel van die Raad op enige wyse oneerbaar of afbrekend teenoor die karakter, of ten nadele van die belange van die Genootskap opgetree het;
- (c) deur sy optrede of gebrek daaraan werklik of moontlike oneer aan die Genootskap gebring het of wat skuldig was aan gedrag ten werklike of moontlike nadele van die doelstellings van die Genootskap;
- (d) met opset of vir persoonlike gewin of voordeel foutiewe informasie aan die Genootskap of enige van sy amptenare of aan beamptes of beoordelaars by skoue verstrek het, of wat aan die liggaam van 'n SA Hackneyperd sodanige veranderings aangebring het om enige persoon te mislei;
- (e) probeer om 'n amptenaar van die Genootskap om te koop; of
- (f) skuldig bevind is op grond van oortreding van die Wet;

MET DIEN VERSTANDE DAT geen stappe vir skorsing geneem sal word teen 'n lid van die Genootskap nie, alvorens die Genootskap nie minstens 30 (dertig) dae voor die datum van die Raadsvergadering waarop sodanige skorsing behandel sal word, 'n geregistreerde brief aan so 'n lid gerig het waarin hy in kennis gestel word van sy voorgestelde skorsing en waarin daar 'n beroep op hom gedoen word om persoonlik, of indien hy so verkies deur sy behoorlike gemagtigde verteenwoordiger, sy kant van die saak op die Raadsvergadering te stel.

8.2.2 Die Raad of enige Komitee van die Raad sal geregtig wees om behoorlik navraag te doen in verband met die gedrag van 'n lid om sodanige informasie by so 'n plek, persoon, firma en/of instansie in ontvangs te neem en daarop te handel op so 'n wyse as wat die Raad mag goeddink.

Die gewone reëlings wat betref die lewering van getuienis sal nie van toepassing wees op sodanige *bona fide* navraag nie en geen lid sal enige aksie, eis en/of reg van verhaal teen die Raad of sy Komitee hê in verband met enige aangeleentheid en/of saak wat voortspruit uit sodanige navraag of informasie wat bekom was nie.

8.2.3 Enige lid wat geskors is, moet deur die Genootskap skriftelik daarvan in kennis gestel word binne drie (3) dae na die datum waarop die besluit met betrekking tot sy uitsetting goedgekeur is.

8.2.4 Na sodanige skorsing van 'n lid mag die Raad aan die Sekretaris opdrag gee om sy naam uit die Kuddeboek en enige ander register of verslae van die Genootskap te verwyder en by die Vereniging aansoek te doen vir die kansellering van alle registrasies ten opsigte van diere wat deur die geskorste lid geteel is en ten tyde van sy skorsing in sy besit was. Die Raad mag verder van die geskorste lid verlang om onverwyld alle registrasiesertifikate ten opsigte van SA Hackneyperde wat ten tyde van sy skorsing in sy besit was, aan die Genootskap te oorhandig. Na sodanige datum sal geen SA Hackneyperde wat deur hom geteel, geregistreer of oorgedra word nie; geen geboortekennisgewing van hom ontvang sal aanvaar word nie en hy sal dienoreenkomstig in kennis gestel word.

- 8.2.5 Enige lid wat geskors word sal alle gelde deur hom aan die Genootskap verskuldig ten volle betaal of al sy verpligtinge nakom ten opsigte van registrasies en oordragte of enige ander verpligtinge met betrekking tot sy lidmaatskap.
- 8.2.6 Enige persoon wat as lid van die Genootskap geskors word bly aanspreeklik vir alle ledegeld en gelde deur hom aan die Genootskap verskuldig ten tyde van sy skorsing.

8.3 Opheffing van Stemreg

- 8.3.1 Enige lid, uitgesonderd lede in Subklousule 6(b) bedoel, wat vir 'n termyn soos wat die Raad van tyd tot tyd mag bepaal, geen SA Hackneyperde in sy naam laat registreer het nie of wat nie geregistreeerde perde gedurende sodanige tydperk aangekoop het waarvan die oordragte in sy naam geregistreeer is nie sal sy stemreg waarna in Subklousule 6(b) verwys word verbeur.
- 8.3.2 Die stemreg van geen lid sal opgehef word mits hy nie ten minste 30 (dertig) dae voor die vergadering waarop sodanige opheffing in werking sal tree daarvan skriftelik deur die Sekretaris in kennis gestel is nie.
- 8.3.3 Sodanige opheffing van stemreg van 'n lid sal van krag bly totdat hy weer SA Hackneyperde laat registreer waarna die opheffing van sy stemreg onmiddellik beëindig sal word sonder dat enige kennisgewing tot dien effekte aan hom gegee moet word.
- 8.3.4 Die opheffing van stemreg op die hierin vermelde wyse sal geensins die ander regte en/of verpligtinge van lidmaatskap affekteer nie

9. HERAANSLUITING VAN LEDE

Enige persoon wat opgehou het om lid van die Genootskap te wees, mag weer vir lidmaatskap in aanmerking kom ooreenkomstig die bepalings van Klousule 4 en nadat alle agterstallige skulde vereffen is en op aanbeveling van die Raad.

10. VERKIESING VAN DIE RAAD EN UITVOERENDE KOMITEE

10.1 Samestelling van die Raad

Die belange van die Genootskap sal beheer en bestuur word deur 'n Raad wat uit die volgende vyf (5) lede sal bestaan en wat ooreenkomstig Subklousule 10.2 tydens die Algemene Jaarvergadering verkies word-

- (a) President,
- (b) Vise-President, en
- (c) drie (3) verkose lede

10.2 Metode van verkiesing

- (a) Verkiesing sal per geslote stembrief geskied. Sodanige stembrief sal geen nommer en/of handtekening bevat om die identiteit van die kieser te openbaar nie.
- (b) Die belange van die Genootskap word beheer en bestuur deur 'n Raad van vyf (5) lede wat tydens 'n Algemene Jaarvergadering of spesiale Algemene Vergadering wat vir dié doel belê is, verkies is.
- (c) Die Algemene Jaarvergadering kies ampsdraers soos volg:
Met geslote stembriefies; eerstens die President, dan die Vise-President en dan drie (3) addisionele Raadslede.
- (d) By die eerste verkiesing na die goedkeuring van hierdie Grondwet word die President vir 'n ampstermyn van twee (2) jaar gekies en die Vise-President vir slegs een jaar. Na verstryking van die Vise-President se een jaar ampstermyn word die Vise-President net soos die President vir 'n termyn van twee (2) jaar gekies.

- (e) Addisionele Raadslede word jaarliks gekies en uittredende lede is herkiesbaar
- 10.3 Indien 'n lid van die Raad te sterwe kom, bedank, ophou om lid van die Genootskap te wees of sy amp verbeur ingevolge Subklousule 10.5, kan die Raad 'n ander lid van die Genootskap aanwys as sy plaasvervanger met volle magte vir die res van sy dienstermyn. Die Raad sal as behoorlik gekonstitueer beskou word, en sal voortgaan om al die magte wat aan hom opgedra is, uit te voer, nieëntstaande enige vakatures wat daarin mag ontstaan.
- 10.4 In die geval waar die amp van President of Vise-President vakant raak voor die verstryking van die tydperk waarvoor hy tot die Raad verkies is, moet die Raad op sy daaropvolgende vergadering per geslote stembrieffies, een uit sy geledere nomineer en verkies om die vakature te vir die onverstreke tydperk te vul.
- 10.5 Lede van die Raad wat van twee agtereenvolgende vergaderings van die Raad afwesig was sonder toestemming of grondige rede, sal hul amp outomaties verbeur.
- 10.6 Benewens die vyf (5) verkose lede van die Raad sal daar ook die volgende persone wees wat op die Raad sal dien in 'n adviserende hoedanigheid, maar sonder stemreg —
 - (a) 'n beampte aangestel deur die Minister ooreenkomstig die bepalings van die Wet;
 - (b) vir uitsonderlike dienste aan die ras mag 'n persoon op aanbeveling van die Raad by 'n Algemene Jaarvergadering verkies word tot Ere-Lewenslange-Vise-President: Met dien verstande dat sodanige aanbeveling deur ten minste tweederdes van die stemgeregtigde lede op die vergadering goedgekeur word; en
 - (c) die Sekretaris wat alle vergaderings van die Genootskap sal bywoon en die reg het om aan besprekings deel te neem, maar egter nie stemreg sal hê nie,
- 10.7 Die Uitvoerende Komitee van die Raad, wat magte sal beklee soos van tyd tot tyd deur die Raad bepaal, sal bestaan uit die President, Vise-President en een lid wat jaarliks deur die Raad verkies word. Alle verrigtinge of besluite van die Uitvoerende Komitee moet op die daaropvolgende Raadsvergadering goedgekeur word.

11. MAGTE EN PLIGTE VAN DIE RAAD

Die Raad het, onderworpe aan die bepalings van die Grondwet en die besluite van die Genootskap soos van tyd tot tyd geneem word, die mag om sodanig op te tree as wat in belang van die Genootskap is, of vir die bevordering en volvoering van sy doelstellings wat nodig of wenslik geag mag word.

In besonder het die Raad die mag om –

- 11.1 betaling van geldlenings op enige wyse te sekureer, insluitende die verhipotekering of verpanding van goed, en sonder om afbreek te doen aan die algemeenheid daarvan, in besonder deur die uitreiking van die soort skuldbrief of skuldbrieffekte, met of sonder sekuriteit;
- 11.2 geld aan enige persoon of maatskappy te leen;
- 11.3 vrywarings en waarborge en borgstellings aan te gaan en betaling daarkragtens op enige wyse te sekureer;
- 11.4 donasies of skenkings te maak;
- 11.5 'n trust te onderneem en uit te voer;
- 11.6 gratifikasie en pensioene te betaal en pensioenskemas en ander aansporingskemas ten opsigte van sy ampsdraers en werknemers tot stand te bring;
- 11.7 onderhewig aan die bepalings van Subklousule 7.1 die ledegelde of verpligtinge van lede van tyd tot tyd te wysig of aan te pas en om enige bykomende gelde en verpligtinge aan te beveel soos nodig geag mag word;

- 11.8 een of meer bankrekenings namens die Genootskap te open en enige wissel, skuldbewys, tjek en ander verhandelbare dokumente wat op sake van die Genootskap betrekking het te trek, te aanvaar, te endosseer, aan te gaan of uit te voer;
- 11.9 geboue, grond, goedere, roerende bates en besittings te koop, te huur, op verband te neem of vir die Genootskap aan te skaf; om roerende goedere of vaste eiendom van die Genootskap te verkoop, te verpand, te verhuur, te vervreem of andersins daarvan ontslae te raak, en die vergoeding daaruit verkry op so 'n wyse aan te wend as wat tot die grootste voordeel van die Genootskap gereken mag word;
- 11.10 enige gelde wat nie vir die onmiddellike behoefte van die Genootskap nodig is nie, te belê of op enige ander wyse te behartig teen sodanige sekuriteite en op sodanige voorwaardes soos die Raad mag goedvind en van tyd tot tyd enige sodanige beleggings te verander of te ontrek: Met dien verstande dat fondse beskikbaar vir belegging slegs belê mag word by geregistreerde finansiële instellings soos omskryf in Artikel 1 van die Wet op Finansiële Instellings (Belegging van Fondse), 1984, en in effekte genoteer op 'n gelisensieerde effektebeurs soos omskryf in Artikel 1 van die Wet op Beheer van Effektebeurse, 1985 (Wet No. 1 van 1985);
- 11.11 al die kostes en rekenings met betrekking tot die administrasie en bestuur van die Genootskap te betaal;
- 11.12 gelde, donasies en ander skulde en fondse in te samel en te ontvang en dit tot voordeel van die Genootskap en ter bevordering van SA Hackneyperde aan te wend;
- 11.13 op sekuriteit van enige eiendom van die Genootskap geld vir die Genootskap te leen;
- 11.14 ooreenkomstig Subklousule 7.3 te weier om inspeksie-, aantekening-, registrasie- en ander werk vir lede te doen indien hulle uitstaande skuld by die Genootskap het;
- 11.15 algemene vergaderings van die Genootskap te belê, of na aanleiding van 'n spesiale versoek daartoe wat volgens die bepalings van die Grondwet gerig is, of andersins indien dit noodsaaklik geag word;
- 11.16 na goeddunke, sodanige ouditeure, prokureurs of ander regsvertegenwoordigers, agente, ampsdraers of amptenare of ander werknemers permanent, tydelik of met die oog op spesiale dienste aan te stel, te ontslaan of te skors; om hulle magte en pligte te bepaal, hul vergoeding en diensvoorwaardes vas te stel en om sodanige voorsorg te tref vir die behoorlike uitvoering van hul pligte, as wat in besondere gevalle raadsaam geag mag word;
- 11.17 'n geding in te stel, te voer, te laat voer, te verdedig, of 'n skikking aan te gaan ten opsigte van enige geregtelike stappe deur of teen die Genootskap of teen enige van sy ampsdraers of amptenare of ander werknemers in verband met die aangeleenthede van die Genootskap; en om enige skulde wat betaalbaar is te verminder, of uitstel te verleen vir die afbetaling daarvan of die voldoening aan enige eise of aanskrywing deur of teen die Genootskap;
- 11.18 enige skulde wat betaalbaar is te verminder, of uitstel te verleen vir die afbetaling daarvan of die voldoening aan enige eise of aanskrywing deur of teen die Genootskap;
- 11.19 kontrakte buite die Suid-Afrika aan te gaan en kontrakte, aktes en dokumente in 'n vreemde land te verkry;
- 11.20 aanbevelings te maak ingevolge die Wet met betrekking tot die invoer en uitvoer van SA Hackneyperde, semen en eiselle;
- 11.21 Inspekteurs/Keurders aan te stel om SA Hackneyperde wat vir registrasie aangebied is te keur en vir die doel van enige ander werksaamhede waarvoor lede van die Genootskap die dienste van die Inspekteurs/Keurders mag verlang en om aan sodanige Inspekteurs/Keurders opdragte te gee en magte te verleen met betrekking tot hul pligte

- om te verseker dat die doelstellings van die Genootskap uitgevoer word, of om hulle te ontslaan;
- 11.22 opdrag te gee aan Inspekteurs/Keurders van die Genootskap om ondersoek in te stel na gevalle waar daar nie behoorlik rekords gehou word nie, of waar daar twyfel mag ontstaan met betrekking tot die identiteit van 'n perd of perde en om sodanige stappe te neem soos in die belang van die Genootskap wesenlik geag mag word;
- 11.23 die dienste van enige persoon of lid van die Genootskap te koop teer en om subkomitees te benoem op sodanige voorwaardes en sodanige magte aan hul te verleen as wat van tyd tot tyd wenslik geag mag word. Die President en Vise-President van die Genootskap is *ex officio* lede van alle subkomitees met alle regte en voorregte. Addisionele lede mag op die Raad koop teer word, maar sulke gekoop teerde lede sal nie stemreg op die Raad hê nie;
- 11.24 sodanige reëls en voorwaardes op te stel met betrekking tot die kwalifikasie en benoeming van beoordelaars van SA Hackneyperde as wat nodig geag mag word, met dien verstande dat geen persoon as beoordelaar van SA Hackneyperde aangestel sal word alvorens hy voldoen aan sodanige vereistes as wat deur die Raad bepaal mag word nie. Verder om van tyd tot tyd die paneel van beoordelaars in heroorweging te neem en om daaruit sodanige name te verwyder as wat nodig geag mag word;
- 11.25 'n sisteem van beoordeling en keuring ten opsigte van inspeksie van SA Hackneyperde in te stel en om reëls, voorwaardes en terme aangaande sodanige inspeksies, en met betrekking tot keuring te formuleer: Met dien verstande dat wanneer die Raad enige sodanige reëls of herroep of op enige ander wyse verander het, sodanige reëls by die eersvolgende Algemene Vergadering van die Genootskap vir die inligting van sodanige vergadering voorlê moet word;
- 11.26 verkope van SA Hackneyperde te organiseer en te bevorder, hetsy deur openbare veiling of uit die hand en om vir hierdie doel afslaaers en agente aan te stel;
- 11.27 aan enige lid van die Raad of enige amptenaar of werknemer van die Genootskap verlof tot afwesigheid toe te staan vir enige tydperk en op sodanige voorwaardes as wat in elke geval bepaal mag word;
- 11.28 een of meer lede of amptenare aan te stel met die gesag om namens die Genootskap dokumente te onderteken, stukke en gegewens te ontvang, geregtelike stappe te doen, op te tree, 'n eis in te stel, of gedagvaar te word, sodat die sake van die Genootskap beter en gemakliker uitgevoer en afgehandel kan word;
- 11.29 verteenwoordiger/s ooreenkomstig Klousule 16 op die Algemene Jaarvergadering van die Vereniging aan te stel en om 'n persoon of persone te benoem om die Genootskap op enige komitee, liggaam of organisasie te verteenwoordig;
- 11.30 aansoeke om lidmaatskap te ontvang en te oorweeg en dit na eie oordeel te aanvaar of af te wys; om persone kragtens Subklousule 4.2.2 as Lewenslange-Erelede te nomineer, om spesiale erelede kragtens Subklousule 4.2.3 te verkies en om kragtens Subklousule 10.6(b) die verkiesing van 'n Ere-lewenslange Vise-president voor te stel;
- 11.31 Rasstandaarde op te stel en minimum vereistes en ander standaarde neer te lê waarvolgens -
- (a) diere deur Inspekteurs/Keurders geïnspekteer word met die oog op registrasie; en
 - (b) onderworpe aan die bepalings van die Wet, aansoeke vir die in- en uitvoer van diere, semen en embrio's oorweeg word;
- 11.32 ooreenkomstig Klousule 8 die lidmaatskap van enige persoon te beëindig;

- 11.33 sodanige strawwe of boetes op te lê of af te dwing as wat van tyd tot tyd vir lede van die Genootskap bepaal mag word vir die oortreding of skending van die Grondwet, reëls en regulasies van die Genootskap;
- 11.34 ondersoek in te stel na geskille wat uit die toepassing van die Grondwet mag ontstaan en om uitsluitel daaromtrent te gee;
- 11.35 enige bylae wat by die Grondwet aangeheg is, te verander of te wysig soos van tyd tot tyd nodig geag mag word;
- 11.36 van tyd tot tyd die Standaard van Voortreflikheid te hersien en aanbevelings aan die Algemene Jaarvergadering te maak; en
- 11.37 in die algemeen alles wat nodig is te doen met die oog op die welvaart van die Genootskap en die hantering van sy sake, altyd op voorwaarde dat enige stappe wat gedoen word of opdragte wat gegee word, nie teenstrydig sal wees met die bepalings van die Wet en die Grondwet nie.

12. VERGADERINGS

12.1 Vergaderings van die Uitvoerende Komitee

Die Uitvoerende Komitee sal wanneer nodig vergader om die pligte wat deur die Raad aan hom opgedra is, uit te voer.

12.1.1 'n Raadslid mag die President verlot vra om persoonlik enige sake van belang voor die Uitvoerende Komitee te lê: Op voorwaarde dat hy volledig op skrif stel wat die aard van die saak is. Indien die Voorsitter besluit dat die saak van genoegsame belang en dringendheid is, mag hy verlot verleen dat so 'n Raadslid die Uitvoerende Komiteevergadering bywoon om, met toestemming van die Komitee, die vergadering toe te spreek.

12.1.2 Indien die Voorsitter nie die saak van genoegsame belang ag nie mag hy verlot tot bywoning weier en indien hy so oordeel, toesien dat die aangeleentheid op die agenda geplaas word

12.2 Raadsvergaderings

12.2.1 Die Raad sal op sodanige tyd en plek vergader as wat van tyd tot tyd deur hom bepaal mag word of soos wat die President, of in sy afwesigheid die Vise-President, mag besluit: Op voorwaarde dat minstens twee Raadsvergaderings gedurende elke finansiële jaar gehou sal word.

12.2.2 'n Spesiale Raadsvergadering

(a) mag deur die President (of in sy afwesigheid deur die Vise-President) belê word, op sodanige tyd en plek as wat sodanige ampsbekleër mag besluit, of

(b) sal belê word op grond van 'n aansoek onderteken deur nie minder nie as drie (3) Raadslede, waarin die redes vir die vergadering gemeld word. Sodanige aansoek moet aan die Genootskap gerig word.

12.2.3 Skriftelike kennisgewing van die tyd, datum en plek van 'n voorgenome Raadsvergadering moet nie minder nie as 21 (een en twintig) dae voor die vergadering sal plaasvind, deur die Sekretaris aan elke lid van die Raad gepos, per e-pos of per faks gestuur word.

12.3 Algemene Vergaderings

12.3.1 'n Algemene vergadering van die Genootskap wat bekend staan as die Algemene Jaarvergadering word een keer in 'n finansiële jaar gehou op so 'n tyd en plek as wat die Raad mag bepaal.

12.3.2 By so 'n Algemene Jaarvergadering sal die Raad sy jaarverslag aan die Genootskap voorlê, tesame met 'n behoorlik geouditeerde balansstaat en 'n

verslag van die finansiële jaar waarop die verslag betrekking het. Sodanige Algemene Jaarvergadering moet gehou word-

- (a) in die geval van die eerste Algemene Jaarvergadering, binne 'n tydperk van 18 (agtien) maande na die datum waarop hierdie Grondwet goedgekeur is;
- (b) nie later nie as ses (6) maande na die einde van elke finansiële jaar van die Genootskap (31 Desember van elke jaar);
- (c) binne hoogstens 15 (vyftien) maande na die datum van die jongste voorafgaande Algemene Jaarvergadering van die Genootskap.

12.3.3 'n Spesiale Algemene vergadering van die Genootskap mag te eniger tyd belê word deur —

- (a) die Raad, of
- (b) die President, (of in sy afwesigheid die Vise-President) en sal in laasgenoemde geval belê word op grond van 'n skriftelike aansoek daartoe, wat aan die Sekretaris gerig is, en wat deur nie minder nie as vyf (5) lede van die Genootskap onderteken is. So 'n aansoek moet die doelstelling/s van die vergadering duidelik uiteensit en gedurende sodanige vergadering mag slegs die gemelde sake behandel word.

12.3.4 'n Voorlopige kennisgewing van die tyd, datum en plek van 'n Algemene Jaarvergadering moet minstens 60 (sestig) dae voor die vergadering deur die Sekretaris aan elke lid gepos of in die amptelike mondstuk van die Genootskap gepubliseer word. Enige lid wat van plan is om enige saak by die Algemene Jaarvergadering vir bespreking voor te lê, moet die Genootskap skriftelik daarvan in kennis stel, nie minder as 40 (veertig) dae voor die vergadering.

12.3.5 'n Finale kennisgewing van die tyd, datum en plek waarop enige Algemene Vergadering gehou sal word, tesame met die agenda vir die vergadering, moet minstens 21 (een en twintig) dae voor die vergadering aan elke lid van die Genootskap gepos word.

12.3.6 Daar sal geen besluit op 'n Algemene Vergadering geneem word, tensy kennis daarvan op die agenda, wat tesame met die kennisgewing van vergadering aan lede gestuur is, verskyn nie, of tensy so 'n vergadering met 'n twee-derde meerderheid van stemme, van lede wat teenwoordig en stemgeregtig is, besluit om enige saak wat nie spesifiek op die agenda is nie, te bespreek en daaroor te stem, ongeag die bepalings van Subklousule 12.3.3(b).

12.3.7 Enige Algemene vergadering mag verdaag word deur 'n twee-derde meerderheidstem van die lede wat daarby teenwoordig is.

12.3.8 Vir die doel om besluite op 'n Algemene Jaarvergadering geneem, te herroep, word 'n twee-derde meerderheid op 'n Algemene Vergadering vereis.

12.4 Voorsitter by Vergaderings

Die President beklee die voorsitterstoel by alle vergaderings en indien hy afwesig is, beklee die Vise-President die amp. Indien daar nie een van hierdie ampsdraers by 'n vergadering teenwoordig is nie, moet die lede wat teenwoordig is, 'n ander lid verkies om by sodanige vergadering die voorsitterstoel te beklee en enige persoon wat op so 'n manier verkies is, sal met betrekking tot daardie vergadering oor die mag beskik om al die pligte van die President uit te voer.

12.5 Neem van Besluite

Alle sake wat voor enige vergadering gelê word, tensy andersins voorsien word, moet besleg word deur die meerderheid van stemme van die lede wat by die vergadering teenwoordig is en stemgeregtig is en in die geval van 'n staking van stemme, sal die persoon wat by daardie vergadering die voorsitterstoel inneem 'n beslissende stem naas sy gewone stem hê.

12.6 Metode van Stemming

Onderworpe aan die bepaling van Subklousule 10.2 sal stemming by alle vergaderings met die opsteek van hande geskied, tensy enige teenwoordige lid stemming per stembriefies verlang in welke geval stemming per geslote stembriefies sal geskied.

12.7 Ongeldigheid van Besluite

Geen saak wat behoorlik en grondwetlik op enige vergadering afgehandel is, kan ongeldig verklaar word slegs weens die feit dat enige lid geen kennisgewing kragtens die vereistes van die Grondwet ontvang het nie.

12.7.1 Geen lid wat nie ten minste drie (3) maande voor die Jaarvergadering by die Genootskap aangesluit het mag stem nie.

12.8 Kworums

12.8.1 Vyf (5) van die lede van die Genootskap wat persoonlik teenwoordig is by die aanvang van enige algemene vergadering vorm 'n kworum vir so 'n vergadering.

12.8.2 Drie (3) Raadslede wat persoonlik teenwoordig is by enige Raadsvergadering en wat stemgeregtig is sal 'n kworum vir so 'n Raadsvergadering vorm.

12.8.3 Twee lede wat persoonlik teenwoordig is by enige Uitvoerende Komitee-vergadering sal 'n kworum vir sodanige Uitvoerende Komitee-vergadering vorm.

12.8.4 Indien daar by enige vergadering nie 'n kworum teenwoordig is nie kan die vergadering verdaag word tot 'n tyd (nie minder as 14 (veertien) dae daarna en plek wat deur die lede persoonlik teenwoordig bepaal word. Op so 'n uitgestelde vergadering vorm die teenwoordige lede wel 'n kworum: Met dien verstande dat enige vergadering waar daar geen kworum is nie, maar die President of Vise-President teenwoordig is, vir 'n halfuur verdaag moet word waarna die lede wat dan teenwoordig is, 'n kworum vorm vir die afhandeling van sodanige sake (behalwe grondwetlike wysigings) as wat die lid wat die voorsitterstoel beklee, dringend mag verklaar. Sodanige verdaging vir 'n halfuur sal nie tot nadeel van die regte van die vergadering wees nie, om, nadat aandag aan die noodsaaklike aangeleenthede gegee is, te verdaag tot 'n tyd en plek soos hierin bepaal.

13. NOTULES VAN VERGADERING

13.1 'n Afskrif van die notule van alle algemene vergaderings sal aan elke lid van die Genootskap voorsien word. Afskrifte van die notules van Raadsvergaderings en Subkomitee-vergaderings sal aan alle Raadslede voorsien word.

13.2 Die notule van alle vergaderings geteken deur die President of 'n persoon wie die voorsitterstoel beklee gedurende die daaropvolgende vergadering, sal bewys wees daarvan dat alle verrigtinge behoorlik geskied het en dat alle verkiesings, aanstellings en besluite aanvaar gedurende sodanige vergadering, bindend en van krag is.

14. FINANSIËLE BEPALINGS

14.1 Die Raad sal een of meer bankrekenings namens die Genootskap open waarin alle gelde wat die Genootskap ook al mag ontvang, gedeponeer moet word.

14.2 Alle betalings uit die fondse van die Genootskap word per tjek of elektroniese bankoorplasing gedoen. Tjeks moet deur die Sekretaris of 'n persoon wat deur die Raad daartoe aangestel is, geteken word en mede-onderteken deur sodanige persoon of persone as wat deur die Raad daartoe gemagtig is, ooreenkomstig Subklousule 11.28: Op voorwaarde dat niks wat hierin vervat is, die Raad sal verhoed om 'n kleinkasfonds in stand te hou en te beheer nie. Ook kan sodanige gereelde en gewone maandelikse rekenings wat nie 'n bedrag wat deur die Raad bepaal is oorskry nie, kontant betaal

word: Op voorwaarde dat die totale bedrag wat nodig is vir die betaling van sodanige rekening per tjek getrek word.

- 14.3 Die Genootskap moet behoorlike rekeningboeke hou wat van tyd tot tyd, maar nie minder nie as een keer per jaar deur 'n ouditeur of finansiële rekenkundige beampte, wat deur die Algemene Jaarvergadering van die Genootskap daartoe aangestel is, geouditeer word en 'n behoorlike geouditeerde balansstaat en verslag van die finansies van die Genootskap soos op 31 Desember van die finansiële jaar waarop die verslag betrekking het, soos uiteengesit in Subklousule 12.3.2, moet aan die Algemene Jaarvergadering van die Genootskap voorgelê word.
- 14.4 Al die besittings van die Genootskap is gevestig in die Raad.
- 14.5 Die inkomste en besittings van die Genootskap, uit watter bron ook al ontvang, insluitende profyte en winste, sal enkel en alleen aangewend word ter bevordering van die doelstellings van die Genootskap en geen deel daarvan sal direk of indirek as dividend of bonus of andersins betaal of oorgedra word aan enige persone wat te eniger tyd lede van die Genootskap is of was nie: Op voorwaarde dat niks wat hierin vervat is die betaling in goeder trou aan enige werknemer of ander persoon vir dienste wat aan die Genootskap gelewer is, kan verhoed nie.
- 14.6 Indien daar na die beëindiging of ontbinding van die Genootskap en nadat al die skulde en verpligtinge nagekom is, enige eiendom oorbly, sal sodanige eiendom nie onder die lede van die Genootskap verdeel of aan hulle uitbetaal word nie, maar geskenk of oorgedra word aan sodanige ander instellings waarvan die doelstellings ooreenstem met dié van die Genootskap soos deur die meerderheid op 'n Algemene vergadering van die Genootskap besluit, en wat opsigself vrygestel is van inkomstebelasting kragtens Artikel 10(1)(cA)(i) van die Inkomstebelastingwet.
- 14.7 Die Finansiële jaar van die Genootskap neem 'n aanvang op 1 Januarie van elke jaar en sluit op 31 Desember van daardie jaar.

15. LIDMAATSKAP VAN DIE VERENIGING EN AFFILIASIE

Die Genootskap sal sy lidmaatskap van die Vereniging in stand hou op die voorwaardes soos deur die Vereniging bepaal. Die Genootskap kan ook met enige vereniging, genootskap of organisasie waarvan die doelstellings nie strydig is met dié van die Genootskap nie, affilieer of inkorporeer: Op voorwaarde dat so 'n besluit goedgekeur word deur minstens twee-derdes van die stemgeregtigde lede wat by enige algemene vergadering van die Genootskap persoonlik teenwoordig is en stem.

16. VERKIESING VAN VERTEENWOORDIGERS TOT DIE RAAD VAN DIE VERENIGING

Ooreenkomstig Subklousule 11.29 moet die Raad 'n verteenwoordiger of verteenwoordigers tot die Raad van die Vereniging verkies.

17. GRONDWETLIKE WYSIGINGS

- 17.1 Byvoegings tot, of wysigings of veranderings van die Grondwet mag slegs aangebring word deur 'n meerderheidsbesluit van nie minder nie as twee-derdes van die lede wat by 'n algemene vergadering van die Genootskap teenwoordig en stemgeregtig is en stem. Ook moet van die voorgestelde wysigings of byvoegings van die Grondwet asook van die vergadering skriftelik kennis gegee word aan elke lid van die Genootskap nie minder nie as 21 (een en twintig) dae voor die vergadering.
- 17.2 Sodanige byvoeging tot, of wysiging van die Grondwet wat goedgekeur is soos in Subklousule 17.1 hiervan beskryf, moet binne 30 (dertig) dae nadat die wysiging aangebring is aan die Vereniging en die Registrateur voorgelê word en dit sal 30 dae nadat dit aldus voorgelê is, in werking tree: Met dien verstande dat indien die Registrateur enige tyd binne hierdie 30 (dertig) dae periode die Vereniging en die Genootskap in kennis stel dat hy van mening is dat die byvoeging en wysiging onbestaanbaar is met die bepaling van die Wet sodanige byvoeging en wysiging van

nul en gener waarde sal word.

17.3 Enige wysiging van die Grondwet moet aan die Kommissaris van die Suid-Afrikaanse Inkomstediens voorgelê word.

18. OORDRAG VAN BEVOEGDHEDE

Ondanks enige bepalings in die Grondwet strydig hiermee, mag enige lid of Geregistreerde Teler deur 'n volmagprokurasie, behoorlik uitgereik en deur die Genootskap geliasseer, 'n ander persoon volmag gee om namens hom geboortekennisgewings, aansoekvorms om registrasie of oordrag, oordragsertifikate, dekkingssertifikate, opgawes of verslae of enige ander dokumente met betrekking tot die adminustrasie van SA Hackneyperde te onderteken, en enige sodanige handtekening deur so 'n ten volle gemagtigde persoon sal deur die Genootskap as net so geldig en bindend aanvaar word asof dit die lid se eie handtekening is: Op voorwaarde dat niks wat hierin vervat is, so 'n gevolmagtigde persoon daartoe in staat sal stel om op enige moontlike manier deel te neem aan die nominering van, of die stemming vir enige Raadslid of oor enige aangeleentheid waarvoor sy prinsipaal stemreg het, of om enige vergadering namens sy prinsipaal by te woon nie.

19. NIE LEDE

Sodanige voordele van lidmaatskap as wat die Raad mag bepaal, mag aan nie-lede verleen word: Met dien verstande dat geen wetlike of ander verpligting op die Genootskap sal rus ten opsigte van sodanige nie-lede nie. Sertifikate van perde wat aan nie-lede verkoop word sal in die kantoor gehou word.

20. KANTOOR VAN DIE GENOOTSAP

Die kantoor van die Genootskap sal op 'n plek wees soos wat die Raad mag bepaal.

21. OUTENTIEKE LESING VAN HIERDIE GRONDWET

Aangesien hierdie Grondwet en die bygaande Bylaes en Skedules in Afrikaans opgestel, ingedien en oorweeg is, word die Afrikaanse weergawe as outentiek beskou.

ALGEMENE VERORDENINGE

1. KUDDEBOEK

Die Genootskap sal toesien dat die Vereniging rekord hou van alle geregistreerde SA Hackneyperde en dat die Kuddeboek, wat bekend sal staan as die SA Hackneyperd Kuddeboek, uit die volgende twee (2) afdelings sal bestaan, nl.:

- (a) 'n Hulpstamboekafdeling; en
- (b) 'n Volgeregistreerde Afdeling van die Kuddeboek.

1.1 Afdelings

1.1.1 Hulpstamboekafdeling

(a) Hulpstamboek A

Enige dier wat uit 'n kudde kom waarvan die teler 'n bevredigende verslag van afstamming aan die Raad kan verstrek en wat aan die minimum rasstandaarde voldoen of enige dier wat oor die vereiste genotipiese *cum* fenotipiese samestelling beskik, sal vir registrasie in die Hulpstamboek A Afdeling in aanmerking kom: Met die voorbehoud dat ten minste een van die ouers van die dier reeds in die Kuddeboek aangeteken is.

(b) Hulpstamboek B

Alle vroulike diere van die parings van Hulpstamboek A merries en Volgeregistreerde hingste sal vir registrasie in die Hulpstamboek B Afdeling in aanmerking kom op voorwaarde dat hulle aan die minimum rasstandaarde en aan al die ander vereistes ten opsigte van registrasie voldoen.

1.1.2 Volgeregistreerde Afdeling van die Kuddeboek

Vir hierdie afdeling van die Kuddeboek kom die volgende diere, indien hulle voldoen aan die minimum rasstandaarde en aan al die ander vereistes ten opsigte van registrasie, in aanmerking vir registrasie -

- (a) alle afstammeling van Hulpstamboek B merries en Volgeregistreerde hingste van die ras; en
- (b) alle afstamming van die paring van Volgeregistreerde diere.

2. VOORVOEGSEL

- 2.1 Perde sal nie vir registrasie aanvaar word nie tensy die teler voor die tyd, deur die Genootskap by die Vereniging vir sy uitsluitlike gebruik 'n voorvoegsel registreer waardeur al die diere wat deur hom geteel is en geregistreer word, onderskei sal word.
- 2.2 Aansoek om die registrasie van sodanige voorvoegsel deur die Vereniging word by die Genootskap gedoen en moet vergesel gaan van sodanige registrasiegelde as wat van tyd tot tyd voorgeskryf mag word.
- 2.3 Die oordrag van 'n voorvoegsel van een teler na 'n ander sal nie toegelaat word nie, behalwe onder sodanige omstandighede en aan sodanige persone as waarvoor in die algemene verordeninge van die konstitusie van die Vereniging voorsiening gemaak word.

3. IDENTIFIKASIE

- 3.1 Kleurmerke aangedui op 'n diagram op die geboortekennisgewing is die Genootskap se amptelike merkstelsel vir die eenvormige en blywende identifikasie van alle perde wat 'n teler in die Kuddeboek wil laat registreer.
- 3.2 Telers moet seker maak dat alle merke met die uiterste sorgvuldigheid aangebring word en moet teen onduidelikheid waak.

- 3.3 Enige SA Hackneyperd wat nie in ooreenstemming met hierdie verordening geïdentifiseer is nie, of waarvan die identifikasiemerke strydig is met die bepalings van hierdie verordening is of waarvan die identifikasie onleesbaar, onnoukeurig of foutief gevind word, kan volgens goëddunke van die Genootskap vir registrasie afgekeur word of indien dit reeds gebeur het, kan sodanige registrasie na goëddunke van die Raad gekanselleer word.
- 3.4 Geen SA Hackneyperd mag verkoop of oorgedra word indien dit nie duidelik geïdentifiseer is nie.

4. INSPEKSIE EN PLIGTE VAN DIE INSPEKTEUR/KEURDER

- 4.1 Die Raad sal Inspekteurs/Keurders aanstel om alle diere waarvoor aansoek om registrasie in die Kuddeboek gedoen word, te keur.
- 4.2 Die Inspekteurs/Keurders sal die voorgeskrewe stelsel toepas en veral aandag aan die bepalings van die Rasstandaarde gee.
- 4.3 Die Inspekteurs/Keurders sal diere van telers inspekteer/keur teen sodanige tarief as wat die Raad van tyd tot tyd mag vasstel. Alle tariewe sal direk aan die Inspekteurs/Keurders betaalbaar wees.
- 4.4 Die Inspekteurs/Keurders mag in opdrag van die Raad van tyd tot tyd sonder waarskuwing 'n algemene inspeksie van enige stoet doen.
- 4.5 Die Inspekteurs/Keurders mag nie kommissie van telers of nie-lede aanvaar om die koop of verkoop van diere te bewerkstellig nie.
- 4.6 'n Teler mag nie as 'n Inspekteur/Keurder van sy eie diere optree nie.
- 4.7 Vullens wat voorgebring word vir inspeksie/keuring met die doel vir registrasie moet met die vul se moeder geïdentifiseer word en moet nog aan die moeder sui.
- 4.8 Van alle vullens gebore na 1 April 2006 moet die Inspekteur/Keurder, na identifikasie van die vul 'n haarmonster van die vul neem om ouerskap van die vul te bevestig. Indien die moeder en/of die vader se DNS profiel nie beskikbaar is nie, moet die Inspekteur/Keurder ook 'n haarmonster van die moeder en/of die vader neem en tesame met 'n afskrif van die geboortekennisgewing en aansoek om registrasie van die vul weggestuur vir tipering na 'n laboratorium van die teler se keuse. Die Inspekteur/Keurder hoef slegs 'n haarmonster van 'n merrie en/of 'n hings te neem wat vir die eerste keer ge-DNS word. Die Inspekteur/Keurder hoef nie uit te gaan om haarmonsters te neem van 'n vul as die hings en merrie alreeds ge-DNS is nie. Die koste van die ouerskap bevestiging is vir die rekening van die teler.

5. NAME

- 5.1 Geen SA Hackneyperd sal in aanmerking kom vir inskrywing in die Kuddeboek nie tensy dit duidelik gemerk en uitdruklik van 'n naam of 'n nommer wat die naam verteenwoordig, voorsien is. Die Raad het die reg om enige aansoek ten opsigte van 'n dier wat na sy oordeel nie duidelik gemerk is nie, of 'n misleidende naam het, te weier.
- 5.2 Geen naam, insluitende die voorvoegsel, mag uit meer as vier (4) woorde bestaan nie en 30 (dertig) spasies oorskry nie.
- 5.3 Indien die naam van 'n SA Hackneyperd eers geregistreer is, kan dit daarna nie weer gewysig of verander word nie, tensy die naam 'n ooglopende fout openbaar in welke geval die naam dan net op so 'n manier verander sal word as wat nodig is om die fout te herstel.

6. KENNISGEWING VAN GEBOORTES

- 6.1 Die teler van 'n vul van 'n SA Hackneymerrie, moet die Genootskap van die geboorte van die vul in kennis stel, ongeag of so 'n vul lewendig of doodgebore is, raseg of 'n kruising is, of vir registrasie behou word al dan nie.
- 6.2 Alle kennisgewings van geboorte moet op die voorgeskrewe geboortekennisgewingvorm geskied (Bylae D) in alle opsigte behoorlik voltooi en deur die teler onderteken en nie later nie as 90 (negentig) dae na die geboortedatums van die vullens aan die Sekretaris gestuur word.
- 6.3 Ongeag Subverordening 6.2 kan die Raad 'n kennisgewing van geboorte aanvaar wat die Genootskap bereik meer as 90 (negentig) dae na die geboorte van 'n vul, indien die kennisgewing verder in orde is: Op voorwaarde dat met die kennisgewing ook die boete ingesluit word wat van tyd tot tyd deur die Raad daarvoor voorgeskryf mag word.
- 6.4 In die geval van veelvoudige geboortes moet die teler benewens die gegewens wat gewoonlik verlang word, ook op die geboortekennisgewingvorm van elke vul, die getal en geslag van die vul/vullens aandui.
- 6.5 Elke teler sal 'n voorraad van geboortekennisgewingvorms hou wat in boekvorm gebind en agtereenvolgend genommer is en op aanvraag deur enige teler van die Sekretaris verkrygbaar is teen 'n prys wat van tyd tot tyd deur die Raad bepaal sal word.
- 6.6 Wanneer 'n teler kennis van 'n geboorte van 'n vul gee moet die afskrif van sodanige vorm so voltooi word dat die inligting wat daarop verskyn in alle opsigte ooreenstem met die gegewens op die oorspronklike vorm of vorms wat aan die Genootskap gestuur is. Al die afskrifte moet deur die teler in die boek waarin dit gebind is, bewaar word op so 'n manier dat dit te alle redelike tye beskikbaar is vir insae en kontrolering. Inskrywings in die geboortekennisgewingsboeke moet agtereenvolgend gedoen word en geen duplikaat mag uitgeskeur of vernietig word nie.
- 6.7 Op ontvangs van 'n geldige vereiste kennisgewing van geboorte van 'n lewendige vul wat nie tot niet gemaak word nie, moet die geboortekennisgewing nagegaan word en die besonderhede ingeskryf word in die boek van die Genootskap en ontvangs daarvan aan die teler erken word.
- 6.8 Die geboortekennisgewing sal die volgende verklaring bevat —
"Ek verklaar dat die afstamming, telingsbesonderhede en identifikasiemerke van die dier/diere wat hierin beskryf, juis is en dat aan al die vereistes van die grondwet, die Konstitusie van die Vereniging en toepaslike wetgewing (indien enige) met betrekking tot geboortekennisgewings voldoen is":
- 6.9 Die geboorte van geen SA Hackneyvul sal aanvaar word en sodanige dier sal nie geskik wees vir registrasie nie tensy die vader en moeder onderskeidelik ouer as 30 (dertig) maande ten tyde van sy geboorte was nie, behalwe indien die Raad dit goedkeur.
- 6.10 Die Raad sal toesien die daar namens elke teler boek gehou word van alle geboortes van vullens (hetsy lewendig of doodgebore) waarvan die teler die Genootskap behoorlik in kennis gestel het en ook van sodanige ander besonderhede wat nodig geag mag word.
- 6.11 Vullens ten opsigte waarvan kennisgewings van geboortes ontvang is en in orde gevind is, sal in die vulboek ingeskryf word, en sal daarin bly totdat hulle goedgekeur word vir registrasie, of afgekeur word.
- 6.12 Alvorens 'n vul registreer word moet die vul eers deur 'n Inspekteur/Keurder, soos aangewys deur die Raad, goedgekeur word vir registrasie.

- 6.13 In gevalle waar vullens wat geskik is vir registrasie verkoop of andersins vervreem word, moet die Genootskap binne 30 (dertig) dae na verkoop of vervreemding daarvan in kennis gestel word deur middel van die indiening van die vulboekrekord, meldende —
- (a) die datum van verkoop of vervreemding; en
 - (b) die volle naam en adres van die nuwe eienaar.
- 6.14 Die bepaling van Subverordening 6.13 geld ook vir vullens wat nog suip wat saam met hul moeders verkoop of vervreem word, altyd inagnemende dat vullens wat so verkoop word se geboortes deur die teler by die Genootskap aangemeld was.
- 6.15 Die Raad mag te eniger tyd die bevestiging van ouerskap deur DNS-tipering van 'n vul verlang indien die kennisgewing van geboorte of aansoek om registrasie laat ingedien word of indien daar enige twyfel aangaande die vul se teling bestaan.

7. DEKKING-/INSEMINERINGSERTIFIKATE EN GESAMENTLIKE BESIT VAN HINGSTE

7.1 Dekking-/Insemineringsertifikate

- 7.1.1 Indien 'n SA Hackneymerrie wat geregistreer of geskik vir registrasie is, gedek is deur 'n SA Hackneyhings wat ten tyde van dekking nie die eiendom van die teler was nie, moet die geboortekennisgewing van die voortspruitende nageslag vergesel gaan van die goedgekeurde voorgeskrewe dekkingsertifikaat onderteken deur die persoon wat ten tyde van die dekking in die rekords van die Genootskap en die Vereniging aangeteken is as die eienaar van die hings. (Bylae C)
- 7.1.2 Sodanige sertifikaat moet die naam en die registrasienommer van die hings, die naam en die registrasienommer van die betrokke merrie, asook die datum van dekking aandui.
- 7.1.3 Ingeval die presiese datum van dekking nie bekend is nie, moet die dekking-sertifikaat die tydperk aandui wat die betrokke merrie en genoemde hings saam geloop het en verder dat die betrokke merrie nie gedurende daardie tydperk deur enige ander hings gedek kon gewees het nie.

8. LEEN-/TYDELIKE OORDRAGSERTIFIKATE

- 8.1 Indien 'n SA Hackneymerrie wat geregistreer of geskik vir registrasie is, gedek is deur 'n SA Hackneyhings wat ten tyde van dekking nie die eiendom van die teler was nie, maar wat aan hom geleen was, moet die geboortekennisgewing van die voortspruitende nageslag vergesel gaan van die voorgeskrewe leen-/tydelike oordragsertifikaat onderteken deur die persoon wat ten tyde van dekking in die rekords van die Genootskap en die Vereniging aangeteken is as die eienaar van die hings.
- 8.2 Sodanige sertifikaat moet die naam en die registrasienommer van die hings, die naam en die adres van die persoon aan wie dit behoort, asook aan wie dit geleen is aandui.
- 8.3 In die geval van 'n leen-/tydelike oordragsertifikaat moet sodanige sertifikaat die presiese datum aandui van wanneer tot wanneer die betrokke hings aan die ander persoon geleen was en dus slegs deur hom gebruik kon gewees het.

9. INSEMINERINGSERTIFIKATE

- 9.1 Insemineringsertifikate in die vorm van Skedule K moet ten tyde van inseminering voltooi word, en die kennisgewing van die betrokke geboorte vergesel, behalwe in gevalle van inseminering ooreenkomstig die bepalings van Artikel 7(4)(b)(i) van die Wet en 'n persoon wat sy eie diere met ingevoerde semen insemineer.

- 9.2 In die gevalle wat uitgesluit is in Subverordening 9.1 hierbo, sal dit slegs nodig wees om die verlangde inligting op die geboortekennisgewingvorm te verstrek.

10. GESAMENTLIKE BESIT VAN SA HACKNEYHINGSTE

- 10.1 Wanneer 'n SA Hackneyhings oorgedra word aan gesamentlike eienaars, moet die volle naam en adres van elke mede-eenaar by die Genootskap en die Vereniging op rekord wees.
- 10.2 Indien merries wat die eiendom van ander telers was en wat die gesamentlike eienaars van die hings is, deur die betrokke hings gedek word, moet 'n dekkingssertifikaat wat ooreenkomstig Subverordening 7.1 vereis word, geteken deur ten minste een van die mede-eienaars, namens al die mede-eienaars, ingedien word.
- 10.3 Indien 'n lid die gebruik van sy hings/te deur 'n mede-lid toelaat, sal die bepaling van Artikel 7(5) van die Wet en hierdie verordening van toepassing wees.

11. DRAGTINGS- EN INTERVULLINGSPERIODE

Die dragtyd wat ten opsigte van SA Hackneyperde erken word, is 330 (driehonderd en dertig) dae. Die minimum dragtyd is 294 (tweehonderd vier en negentig) dae, en die maksimum 364 (driehonderd vier en sestig) dae. Geen dragtyd buite hierdie tydsbestek sal erken word nie tensy ouerskap deur 'n DNS-toets bevestig word.

Die minimum periode tussen die geboortedatums van twee agtereenvolgende vullens uit een merrie sal 300 (driehonderd) dae wees.

12. VEREISTES VIR REGISTRASIE

- 12.1 Aansoek om die registrasie van SA Hackneyperde moet op die neergelegde vorm gedoen word.
- 12.2 'n Aansoekvorm sowel as die daaropvolgende registrasiesertifikaat met betrekking tot 'n SA Hackneyperd wat deur kunsmatige inseminering verwek is of ontstaan het deur inovulering, moet so geëndosseer word en onderskeidelik met die woorde “deur kunsmatige inseminering verwek” of “deur inovulering verwek” of die afkorting “KI” of die afkorting “INOV” agter die naam van die betrokke SA Hackneyperd ingevoeg word.
- 12.3 Geen aansoek om registrasie van 'n SA Hackneyperd wat *in utero* ingevoer is, sal deur die Raad aanbeveel word tensy die moeder deur die Vereniging geregistreer is en tensy die aansoek vergesel gaan van-
- (a) 'n dekkingssertifikaat geëndosseer deur die rasgenootskap in die land van herkoms of insgelyks deur 'n geëndosseerde insemineringssertifikaat (afhangende daarvan of die bevrugting deur natuurlike dekking of kunsmatige inseminering geskied het), en
 - (b) bewys dat die ouers voldoen aan die vereistes soos deur die Raad van tyd tot tyd bepaal.

13. TOEPASSING VAN KUNSMATIGE INSEMINERING

- 13.1 SA Hackneyperde wat wettiglik deur kunsmatige inseminering verwek is (dit is in ooreenstemming met die Wet), sal vir registrasie in aanmerking kom: Op voorwaarde dat aan al die vereistes van die Grondwet met betrekking tot registrasie *mutatis mutandis* voldoen is.

- 13.2 Geen geboortekennisgewing van vullens wat so verwek is, sal met die oog op registrasie aanvaar word nie, tensy dit geëndosseer is “Deur Kunsmatige Inseminering verwek”.
- 13.3 Indien verskillende hingste vir die verskaffing van semen gebruik word vir die kunsmatige inseminering van dieselfde merrie, minder as 50 (vyftig) dae uitmekaar, sal geen nageslag wat verwek mag word vir registrasie in aanmerking kom nie, ongeag die bepalings van Verordinge 7.1 tensy die vaderskap deur DNS bevestig is nie.
- 13.4 Die Genootskap behou die reg voor om deur middel van sy ampsdraers toesig te hou oor, en/of inspeksie uit te voer aangaande die noukeurige aantekening van die toepassing van kunsmatige inseminering deur sy lede.
- 13.5 Die Genootskap behou die reg voor om te weier om nageslag wat deur kunsmatige inseminering verwek is, te laat registreer indien enige van die reëls en regulasies wat deur die Genootskap neergelê is nie ten volle nagekom is nie.
- 13.6 Telers wat in sodanige gebiede buite die RSA woon wat die voorregte van registrasie van SA Hackneyperde geniet, mag aansoek doen om die registrasie van kunsmatig-verwekte nageslag: Op voorwaarde dat die semen verkry word van ‘n bron wat deur die Genootskap goedgekeur is; en verder op voorwaarde dat die opvang van die semen, die hantering daarvan, die inseminering van SA Hackneyperde en die hou van verslae so gedoen word as wat die Genootskap van tyd tot tyd mag goedkeur.

14. OPVANG EN STOOR VAN SEMEN VAN SA HACKNEYHINGSTE WAT NIE INGEVOLGE ARTIKEL 10 VAN DIE WET GOEDGEKEUR IS NIE EN DIE REGISTRASIE VAN NAGESLAG VOORTSPRUITEND UIT DIE GEBRUIK VAN SODANIGE SEMEN

- 14.1 Die Genootskap bevestig die reg van telers om semen van hul eie SA Hackneyhingste vir gebruik op hul eie SA Hackneymerries op te vang, te bevries en te stoor ongeag daarvan of die hingste ingevolge die bepalings van die Wet vir die opvang van semen goedgekeur is al dan nie.
- 14.2 Indien ‘n SA Hackneyhings waarvan semen opgevang is vir kunsmatige inseminering verkoop word, moet die verkoper van sodanige SA Hackneyhings ‘n sertifikaat aan die nuwe eienaar daarvan verstrek waarin aangedui word dat semen van die SA Hackneyhings voor sodanige verkoop aldus opgevang is, en waarin die name van alle vorige eienaars van sodanige hings aangedui word en hy moet ‘n afskrif van sodanige sertifikaat aan die Vereniging verstrek.
- 14.3 Die nageslag verwek deur die gebruik van diep bevrore semen van SA Hackneyhingste wat nie ingevolge die Wet vir die opvang van semen goedgekeur is nie, sal geskik wees vir registrasie mits aan die bepalings van die Grondwet sowel as die Wet voldoen is.

16. INGEVOERDE SEMEN

Nageslag verwek deur kunsmatige inseminering in ooreenstemming met die vereistes van die Grondwet en die Wet uit geregistreeerde merries of merries geskik vir registrasie, met ingevoerde semen sal geskik wees vir registrasie mits ‘n aanvaarbare uitgebreide tweegerasiestamboom en ‘n DNS-sertifikaat van die semenskenker aan die Genootskap en die Vereniging voorgelê word.

17. REËLS MET BETREKKING TOT DIE OPVANG VAN EISELLE EN EISEL-OORPLASINGS (E.O.)

- 16.1 SA Hackneyvullens wat wettiglik deur eisel-oorplasing ontstaan het (d.i. in ooreenstemming met die Wet) sal vir registrasie in aanmerking kom: Op voorwaarde dat —
- (a) aan die vereistes van die Grondwet *mutatis mutandis* voldoen is;
 - (b) ouerskap van elke vul voortspruitend uit ‘n eisel-oorplasing deur DNS-tipering bevestig is;

- (c) die volgende dokumente binne 120 (eenhonderd en twintig) dae na inovulering ingedien word —
 - (i) 'n behoorlike voltooide inovuleringsertifikaat (Skedule O),
 - (ii) die DNS-laboratoriumnommers van die eiselskenker en die semen-skenker, en
 - (iii) 'n sertifikaat deur 'n Veearts, Eiseloerplaser of in die geval van binnekudde E.O. die eienaar of 'n persoon voltyds in sy diens tot dien effekte dat die bepalings van die Wet nagekom is;
 - (d) die geboortekennisgewing vergesel gaan van 'n DNS-tipering laboratoriumnommer van beide skenkers en die betrokke nageslag en 'n sertifikaat te dien effekte dat ouerskap soos aangegee korrek is;
 - (e) dat beide die semenskenker en die eiselskenker vir sodanige doeleindes deur die Raad goedgekeur is wie ook die reg sal hê om die aantal nageslag wat ontstaan het van die eiselle van 'n enkele eiselskenker, te beperk vir aanvaarding vir registrasie;
 - (f) nageslag wat deur eisel-oorplasing ontstaan het sal vir registrasie aanvaar word onderworpe daaraan dat die betrokke nageslag geïnspekteer word en voldoen aan die minimum vereistes soos deur die Raad bepaal mag word vir die betrokke afdeling van die Kuddeboek.
- 16.2 Die Genootskap behou die reg voor om deur middel van sy ampsdraers toesig te hou oor en inspeksie uit te voer aangaande die rekordhouding van die opvang van eiselle en inovulering.
- 16.3 Telers wat in sodanige gebiede buite die RSA woon sal die voorreg van registrasie geniet ooreenkomstig die bepalings van die Wet en mag aansoek doen vir registrasie van nageslag wat deur eisel-oorplasing ontstaan het: Op voorwaarde dat die eiselle verkry is van 'n bron wat deur die Genootskap en die Vereniging goedgekeur is; en verder op voorwaarde dat die opvang van eiselle, die hantering daarvan, die inovulering van diere en die hou van verslae op so 'n wyse gedoen word as wat die Vereniging van tyd tot tyd mag bepaal.
- 16.4 Die Genootskap behou die reg voor om te weier om nageslag wat deur eisel-oorplasing ontstaan het vir registrasie aan te beveel indien enige van hierdie verordeninge nie ten volle nagekom is nie.

17. NAGESLAG ONTSTAAN DEUR INGEVOERDE EISELE

- 17.1 Nageslag wat deur inovulering met ingevoerde eiselle ontstaan het sal vir registrasie in aanmerking kom: Op voorwaarde dat aan al die vereistes van die Grondwet *mutatis mutandis* voldoen is.
- 17.2 Die vereistes vir registrasie sal dieselfde wees as dié vir ingevoerde SA Hackneyperde.
- 17.3 Sodanige ingevoerde eiselle moet in die land van oorsprong opgevang word deur 'n bevoegde liggaam (goedgekeur deur die Afdeling Veeartsenydiens van die Departement) van eiselskenkers wat aan die minimum vereistes voldoen soos deur die Genootskap bepaal en goedgekeur is deur die Vereniging vir die invoer van eiselle en , indien bevrug, moet sodanige eiselle bevrug wees met die semen van 'n hings wat eweneens aan die minimum vereistes voldoen soos bepaal deur die Genootskap en goedgekeur is deur die Vereniging.

18. INGEVOERDE EISELLE

- 18.1 Die inovuleringsertifikaat van nageslag wat deur inovulering met ingevoerde SA Hackneyperdeiselle ontstaan het, moet onderhewig aan die bepalings van Verordening 12, ook vergesel gaan van —

- (a) 'n sertifikaat deur 'n erkende bevoegde liggaam in die land van oorsprong uitgereik en waarop aangedui word —
 - (i) die naam, identifikasie- en registrasienommer van die eiselskenker;
 - (ii) die datum en plek van opvangs;
 - (iii) die aantal lewensvatbare eiselle opgevang van die betrokke eiselskenker;
 - (iv) dat die eiselle opgevang is vir uitvoer na die Gebiede;
 - (v) die naam en adres van die invoerder aandui; en
- (b) in die geval van 'n bevrugte eisel ook 'n sertifikaat behoorlik geteken deur 'n erkende bevoegde liggaam in die land van oorsprong en waarop aangedui word —
 - (i) dat die bevrugting deur kunsmatige inseminering verwek is; en
 - (ii) die naam, identifikasie- en registrasienommer van die betrokke semenskenker, asook die datum en plek van inseminering.

19. DNS-TIPERING

Ongeag die bepalings van Verordening 4 behou die Raad die reg om te eniger tyd indien dit nodig geag word, 'n DNS-tiperingsstoets van enige SA Hackneyperd te vereis met die oog op ouerskapbepaling/identifisering. Die kostes verbonde aan die toetse sal deur die eienaar gedra word. In gevalle waar enige twyfel bestaan aan die kant van die teler of eienaar met betrekking tot die ouerskap van 'n SA Hackneyperd, en ouerskapbepaling deur DNS-tipering uitgevoer word, moet die kostes deur die persoon gedra word wat om verlangde DNS-tiperingsstoets aansoek gedoen het.

DNS-tipering van alle teelthingste is verpligtend ongeag bostaande.

20. VEREISTES TEN OPSIGTE VAN REGISTRASIE

- 20.1 Inspeksie is 'n voorvereiste vir registrasie van alle SA Hackneyperde en sal die Inspekteur/Keurder van 'n vul verseker dat die inligting soos op die aansoek om registrasie, volledig en korrek voltooi is sowel as identifikasie deur kleurmerk beskrywing duidelik is.
- 20.2 Perde wat nie aan die minimum standaard soos deur die Genootskap neergelê voldoen nie, sal nie vir registrasie in aanmerking kom nie.
- 20.3 Indien daar twyfel bestaan oor die besonderhede wat op die geboortekennisgewingvorm of meegaande dekkingsertifikaat van 'n SA Hackneyperd verskyn, mag die perd na oordeel van die Raad van registrasie uitgesluit word.
- 20.4 Die registrasie van alle SA Hackneyperde deur die Vereniging word op aanvraag van die Genootskap gedoen, en elke teler wat sulke perde het moet 'n rekord hou waarin die geboortedatums van alle vullens ingeskryf word tesame met besonderhede oor die geslag en teling, asook van verkope, vrektes, kastrasies, sterilisering, ens., in gebreke waarvan verdere inskrywings deur die Raad gediskwalifiseer of geweier mag word. Telers kan te eniger tyd deur 'n Inspekteur/Keurder gelas word om sodanige verslae vir inspeksie voor te lê.

21. INGEVOERDE SA HACKNEYPERDE

Ingevoerde SA Hackneyperde sal slegs geskik wees vir registrasie indien die aansoek om registrasie vergesel gaan van —

- 21.1 'n sertifikaat van registrasie uitgereik deur 'n bevoegde gesag in die land van herkoms wat deur Vereniging erken is;
- 21.2 bewys tot dien effek dat die betrokke perd beantwoord aan die vereistes soos wat van tyd tot tyd bepaal mag word insluitende 'n volledige uitgebreide tweegeslagstamboom.

22. REKORDS VAN SA HACKNEYPERDE

- 22.1 Perde wat in die Vulboek ingeskryf is en wat voldoen aan die vereistes met betrekking tot inspeksie/keuring en registrasie soos in die verordeninge neergelê is, word in die Kuddeboek ingeskryf.
- 22.2 Die Kuddeboek sal die nommer, die vader en moeder se nommer, die datum van geboorte, die naam van die teler en eienaar, bevat.
- 22.3 Op aansoek deur die Genootskap sal sertifikate van registrasie deur die Vereniging uitgereik word ten opsigte van alle SA Hackneyperde wat in die Kuddeboek ingeskryf is. Sodanige sertifikate sal die besonderhede van die identifikasiemerke en die stamboom toon.

23. OORDRAGTE

- 23.1 Vir alle verkope of verwisseling van eienaarskap van 'n SA Hackneyperd of SA Hackneyperde of ontvangermerries moet aansoek om oordrag aan die koper of nuwe eienaar by die Genootskap gedoen en die oordraggelde betaal word deur die verkoper of oordraer.
- 23.2 Sodanige aansoek om oordrag moet binne 30 (dertig) dae na die oordragdatum van die betrokke perd aan die Genootskap gepos of oorhandig word: Op voorwaarde dat indien die aansoek later as 30 (dertig) dae na die oordragdatum aan die Genootskap gepos of oorhandig word boetes soos deur die Raad bepaal, betaalbaar sal wees.
- 23.3 'n Aansoek om sodanige oordrag wat meer as 90 (negentig) dae na die oordragdatum aan die Genootskap gepos of oorhandig word, sal deur die Raad oorweeg word en kan aanvaar word na die betaling van sodanige gelde as wat die Raad van tyd tot tyd mag bepaal. 'n Aansoek om die oordrag van 'n SA Hackneyperd moet vergesel gaan van die geboortekennisgewingbewys of registrasiesertifikaat van die betrokke perd waarop die volle naam en adres van die nuwe eienaar asook die handtekening van die verkoper of oordraer en die oordragdatum ingevul is in die spatie wat daarvoor op die sertifikaat gelaat is.
- 23.4 Vir die doel van die voorgaande Verordening (23.3), word die oordragdatum gereken as die datum waarop die perde die besit van die verkoper of oordraer verlaat.
- 23.5 Indien die dier wat oorgedra word, dragtig is, moet die oordraer, tesame met sy aansoek om oordrag ook 'n dekking-of insemineringsertifikaat (afhangende of die dragtigheid deur natuurlike dekking of KI bekom is) aan die Genootskap voorlê. Sodanige dekking- of insemineringsertifikaat moet die dekkingsdatum aandui, asook die volle naam en registrasienommer van die hings en moet 'n verklaring bevat ten effekte dat die betrokke merrie op die datum van oordrag aan die koper nie deur enige ander hings gedek kon gewees het nie as die een wat in die dekking- of insemineringsertifikaat genoem is.
- 23.6 Verandering van eienaarskap sal as plaasgevind beskou word indien —
 - (a) 'n perd verkoop, geruil of geskenk is;
 - (b) 'n perd geërf is;
 - (c) 'n vennootskap ontbind is;
 - (d) 'n hings geregistreer is in die name van twee of meer eienaars gesamentlik en enige van die twee of meer eienaars afstand doen van sy/hulle aandeel in die hings wat so geregistreer is, of om enige rede afstand doen van sy belange in genoemde geregistreerde hings.
- 23.7 Indien die Raad van mening is dat die verkoper of oordraer heeltemal in gebreke bly of weier om enige stappe te doen ten uitvoer van sodanige oordrag en in gebreke bly of weier om die oorspronklike registrasiesertifikaat te voorsien en indien die nuwe eienaar bereid is om sodanige gelde as wat die Raad mag voorskryf, te betaal, mag die Raad met die toestemming van die Vereniging, sodanige stappe doen as wat nodig geag mag word om te

voldoen aan die wense van die koper of nuwe eienaar: Op voorwaarde dat in so 'n geval die boetebepaling wat in Subverordeninge 23.2 en 23.3 hiervan neergelê is, op die nuwe eienaar van toepassing is.

23.8 In gevalle van oordrag tussen eggenote of van ouer na kind of kind na ouer (insluitend aangetroude en kleinkinders), ongeag die feit of dit deur verkoop, skenking of erwing geskied, sal slegs die helfte van die voorgeskrewe gelde betaalbaar wees.

23.9 Indien dieselfde lid meer as een stoetery het wat op plase in verskillende landrosdistrikte gehou word moet kennis binne 30 (dertig) dae aan die Genootskap en die Vereniging gegee word op die neergelegde vorm van verskuiwing van enige SA Hackneyperde vanaf die een stoetery na die ander op soortgelyke wyse as kennisgewing van oordrag van sodanige perde. Oordraggelde sal egter nie in sodanige gevalle betaalbaar wees nie.

24. VERANDERINGS OF BYVOEGINGS OP REGISTRASIESERTIFIKATE

Enige wysiging van of byvoeging tot die inligting of besonderhede wat amptelik op enige registrasiesertifikaat van 'n SA Hackneyperd voorkom en wat nie deur die Hoofbestuurder van die Vereniging geparafeer is nie of enige ongematige endossement of opmerking op sodanige sertifikaat, sal sodanige sertifikaat ongeldig maak.

25. DUPLIKAAT REGISTRASIESERTIFIKATE

25.1 'n Duplikaat van die oorspronklike registrasiesertifikaat van 'n SA Hackneyperd sal op aansoek deur die Vereniging uitgereik word indien daar tot bevrediging van die Raad bewys gelewer kan word dat die oorspronklike verlore is, per ongeluk vernietig is, of in die besit is van 'n persoon wat wederegtelik weier om dit aan die persoon wat daarop geregtig is, te oorhandig.

25.2 Die aansoek om 'n duplikaat registrasiesertifikaat moet vergesel gaan van 'n beëdigde verklaring deur die aansoeker, wat die eienaar van die betrokke SA Hackneyperd moet wees. Sodanige aansoek en beëdigde verklaring moet aan die Genootskap gerig word, tesame met sodanige gelde as wat die Raad van tyd tot tyd voorskryf.

26. SERTIFIKAAAT VAN UITGEBREIDE STAMBOOM

Enige persoon mag deur die Genootskap by die Vereniging aansoek doen om 'n uitgebreide stamboom met betrekking tot 'n SA Hackneyperd wat in sy naam geregistreer is of ten opsigte waarvan 'n geboortekennisgewing uitgereik is. Elke sodanige aansoek moet van die voorgeskrewe geld vergesel gaan soos van tyd tot tyd deur die Raad bepaal mag word.

27. INVOER EN UITVOER VAN PERDE, SEMEN EN EISELLE

27.1 Aansoek vir die in- of uitvoer van SA Hackneyperde, hul semen of eiselle sal ooreenkomstig die Wet in triplikaat op die vorms (soos deur die Registrateur neergelê) by die Genootskap ingedien word, wat een afskrif tesame met sy aanbeveling aan die Registrateur stuur en die ander afskrif aan die Vereniging sal stuur.

27.2 Die applikant sal 'n afskrif van sodanige aansoek tesame met die bepaalde gelde aan die Registrateur voorsien.

27.3 Die Raad sal minimum prestasie- en ander vereistes vir die in- en uitvoer van SA Hackneyperde, semen en eiselle bepaal.

27.4 Ingevoerde SA Hackneyperde en perde wat die resultaat is van ingevoerde semen en eiselle wat voldoen aan die minimum vereistes waarna in Subverordening 27.3 verwys word en aan die vereistes van die Grondwet voldoen, sal in aanmerking kom vir registrasie.

27.5 Die Vereniging mag uitvoersertifikate ten opsigte van SA Hackneyperde, semen of eiselle, op aanvraag uitreik.

28. UITVOERSERTIFIKATE

Die registrasiesertifikaat van 'n SA Hackneyperd is die uitvoersertifikaat van die Genootskap.

29. KENNISGEWING VAN GEBEURE WAT DIE KANSELLERING VAN REGISTRASIESERTIFIKATE NOODSAAK

29.1 Indien 'n SA Hackneyperd vrek, gekastreer of gesteriliseer, of vir ander dan teeldoeleindes verkoop word, moet die Genootskap binne 30 (dertig) dae na sodanige gebeure daarvan in kennis gestel word en die registrasiesertifikaat of geboortekennisgewingsbewys van sodanige perd moet terselfdertyd aan die Genootskap teruggestuur word met die datum van die onderskeie gebeure behoorlik daarop geëndosseer.

29.2 Sodanige sertifikate moet onverwyld aan Genootskap teruggestuur word vir kansellering deur die Vereniging

30. KANSELLERING VAN REGISTRASIE

30.1 Die Raad mag die Sekretaris versoek om by die Vereniging aansoek te doen om die kansellering van die registrasie van 'n SA Hackneyperd wat —

- (a) verkeerdelik geregistreer is;
- (b) geristreer is op grond van valse of bedrieglike inligting wat deur die eienaar verstrekk is;
- (c) geregistreer is nadat die eienaar versuim het om te voldoen aan enige verordeninge waaraan voldoen moes word om te verseker dat die registrasie foutloos geskied.

30.2 Voordat om die kansellering van 'n registrasiesertifikaat aansoek gedoen word, moet die Sekretaris die eienaar van 'n perd minstens 30 (dertig) dae voor die tyd skriftelik, na sy jongste bekende adres, kennis gee van sy voorneme om dit te doen.

31. HERSTEL VAN DIERE IN DIE KUDDEBOEK

Indien die geboortekennisgewingsbewys of registrasiesertifikaat van 'n SA Hackneyperd gekanselleer is, sal sodanige perd slegs op aanbeveling van die Raad in die Kuddeboek herstel word: Op voorwaarde dat die aansoek om herstelling van die perd deur dieselfde persoon aangevra word wat om die kansellering daarvan aansoek gedoen het. Die aansoek om die herstelling van 'n perd moet vergesel gaan van die gelde wat van tyd tot tyd hiervoor deur die Raad bepaal word.

BYLAE A

GELDE VAN DIE GENOOTSKAP

FOOIE 2010

INTREEFOOI	R114.00
LEDEGELD	R950.00
VOORVOEGSEL	R65.00
GEBOORTEKKNISGEWINGBOEK	R50.00
DEKKINGSBOEK	R50.00
DUPLIKAAT, WYSIGING, RESTELLING	R20.00
VULREGISTRASIE	R50.00
GEBOORTEKENNISGEWING	R50.00
OORDRAG	R50.00
SKOULIDMAATSKAP	R100.00
HEFFING PER PERD	R22.80
HERINSTELLING	R2.70
SAKWAPEN	R60.00
DAS	R60.00

BYLAE A

GELDE VAN DIE GENOOTSKAP

FOOIE 2011

INTREEFOOI	R300.00
LEDEGELD	R990.00
VOORVOEGSEL	R95.00
GEBOORTEKKNISGEWINGBOEK	R150.00
DEKKINGSBOEK	R50.00
DUPLIKAAT, WYSIGING, RESTELLING	R50.00
GEBOORTE EN REGISTRASIE	R100.00
OORDRAG	R100.00
SKOULIDMAATSKAP	R100.00
HEFFING PER PERD	R25.00
HERINSTELLING	R100.00
SAKWAPEN	R100.00
DAS	R100.00